

## LIBRU UNDICESIMU

### *Scinni la notti, discussioni di tregua*

La notti cala e cessa l'ammazzari,  
ca nun cunsentì lu vilami scuru  
d'aviri chiara cugnizioni in campu.

Trova lu varcu la latina schiera  
pi ritornari tra li mura amichi.

Puru l'esercitu troicu-tuscanu  
trova rizettu nta l'accampamentu.

Si cuntanu li morti e li firiti  
e l'indumani da Laurentu in luttu  
arrivanu li messi nta lu campu  
ca vonnu tregua pi dunari paci  
a chiddi ca mureru cumbattennu.

Capivu Enea ca sunu li latini  
tanticchia titubanti ca di certu  
nun si pinsava tanta resistenza  
e tanta morti. Allura dici: - Tregua  
vi dugnu e puru paci si vuliti!

Nudda ragioni spingi nui Trujani  
a fari guerra contru li latini,  
D'iddi, sulu lu regi n'havi a dari  
cuntu di chiddi ca facivu contru  
a la parola data e Turnu puru,  
ca m'affinnivu e poi si ni scappavu.

Paci propongu e Turnu sulamenti  
invitu in campu a singolar tenzoni  
quann'é ca voli e comu chiù ci aggrada,  
ch'é troppu vecchiu re Latinu a chistu!

Turnarunu cuntenti li latini,  
ca li guidava Drance c'appruvava  
e prumitteva na risposta chiara.  
Teucri e latini, ognunu nto so postu  
onuri dettiru a li morti in paci.  
Fu rimannatu mortu a Pallanteu  
lu corpu di Pallanti in pompa magna,  
unni fatali fu l'eventu accettu  
ed onoratu comu eroi cadutu  
fu lu picciottu pi la patria santa.

*Dranci indici*  
*lu cunsugghiu generali di Laurentu*

Lu fumu in celu acchiana di li piri  
apparicchiati nta lu lidu e puru  
nta la citati di Laurentu. Drance,  
ca richiamavu in sedi Re Latinu,  
indici lu cunsigghiu di lu statu  
e cu lu tonu di l'opposizioni  
daccussì parra: - Onori damu certu  
a cu murivu cummattennu amici,  
puru siddu la guerra nun é giusta  
pirchè cu' mori pi la patria é santu  
pi vuluntà di populu e di Giovi.  
Ma c'é cu culpa ci havi di sti morti,  
c'arrusbigghiavu Marti ca durmeva  
e poi scumpari dunni chiù furenti  
sunu li scontri nta lu campu apertu.  
Enea proposta fici di paci e noni  
guerra, ca non vuleva e ca non voli.  
In paci vinni cu li manu chini

di riali a re Latinu, ca l'accolsi  
fraternamenti e dopu cu la spada  
vinni assaltatu senza mutivanza.  
Si c'è qualcunu ca non voli chiù  
ristari signurinu, lu prijamu  
d'accittari la sfida di lu Troju  
e dari fini a sta mulesta guerra,  
ca sulu peni sfurna, morti e luttu. -

### *Proposta di re Latinu*

Finutu di parrari, Dranci, capu,  
oggi dicemu, di l'opposizioni,  
cuntrariu a Turnu ca lu detestava,  
lu re Latinu pigghia la parola  
e circannu di dari soluzioni,  
c'accordi cu la vutti lu timpagnu,  
proponi d'assignari terra, quantu  
basta, a li Troj pi dari ad iddi paci,  
suddisfacenti scusi ed amicizia. -  
Ma Turnu pigghia la parola e dici:

### *Turnu rimbecca ed abbannuna l'assemblea*

- Dranci tu ca sai fari guerra sulu  
a vuci e si' capaci d'affussari  
la patria cu discursi strani, mentri  
mumentu é chistu d'essiri concordi,  
t'additu a tutti comu tradituri.

A tia l'incaricu fu sulu datu  
di concordari tregua pi li morti  
e non pigghiari accordi cu pirati,  
vinuti sulamenti pi rubari,  
comu fu fattu a Sparta tempu arreri.

Sai chi ti dicu? Curri in campu accantu  
a stu ladruni c'addifenni tantu,  
oppuru resta ddocu, comu voi,  
c'a mia lu tempu scurri e nun lu perdu  
a diri cosi disinsati. A prestu  
risposta dugnu e ti prumettu dopu  
ca la to testa in bona cumpagnia  
appennu cca davanti a stu palazzu.  
Cu l'armi e non a matula parrannu  
mi si cunfà risolviri li cosi.  
Accussì dici Turnu e fora nesci  
lassannu leggiu lu so scannu e curri  
a priparari nautru attaccu in campu.

### ***La risposta di Diomedi***

Dopu s'apprisintavu a lu cunsessu  
l'ambasciaturi Venulu agghicatu  
cu la risposta saggia di Diomedi.

Lu grecu fa sapiri ca finivu  
la guerra contru la città di Troja  
e nun ha sensu cuntinuarla contru  
li so figghi custretti ad emigrari.  
Iddu non sulu nun duna l'assensu,  
ma cunsigghia d'accogliri li troj  
in paci e cu rispettu pirchè sannu  
comu si fa la guerra, ca deci anni  
palestra bona foru di custanti  
allenamentu e sunu mastri d'armi.  
Lu parlamentu mutu resta e taci  
pirchè non poti chiù trattari paci,  
ca Turnu già partivu pi l'attaccu.

*Si ritorna a pugnari  
Pianu strategicu d'Enea*

Focu s'attizza la secunna vota  
da lu devianti rutulu addumatu!  
Curri la Fama nta lu campu Troju,  
ca tuttu cunta di lu parlamentu  
e chiddu ca si dissì e ca si fici.  
D'attaccari Laurentu Enea decidi  
e porri fini daccussì a la guerra.  
Li cavaleri schiera in campu apertu  
contru li mura arditi di Laurentu  
cu l'intentu cridutu d'attaccarli,  
mentri li fanti dalla parti opposta  
iddu stissu cumanna pi sfirrari  
l'attaccu risulventi allantrasatta  
e trasiri in citati vincituri.

*Contromossa latina*

Capivu Turnu lu tuscanu pianu  
e cu perizia rinfurzò li mura;  
indi a Camilla l'ordini ci detti  
di rintuzzari cu li cavaleri  
l'attaccu in campu apertu di li troj,  
mentri s'apposta nta l'antichi furchi  
aspittannu l'arrivu di li turchi.

*Camilla*

Era Camilla vergini ciuciara,  
nata e crisiuta supra li cavaddi,  
cu l'arcu nta li manu e la faretra,  
da Metabu so patri, cara a Diana,  
ca prutiggeva la so vita curta



*Era Camilla vergini ciuciara,  
nata e crisciuta supra li cavaddi ...*

*pag. 143*

comu lu Fatu decretavu già,  
ma ca prumissa fici di minnitta  
a cu l'avissi accisa nta lu campu.  
Di masculi lu ciavuru non senti  
e di l'Amuri l'appuntuti dardi  
nun percianu lu cori, assortu sulu  
a scavaddari e battiri li selvi,  
disiusu sulu d'avvinturi forti.  
Idda di cursa arrispunnivu a Turnu,  
ca ni fici la cummannanti in capu  
di li surdati cavalcanti in armi.

### *Scontru di cavalleria*

Frimenti di pugnari, lu squadruni  
appronta e fora di li mura a centru  
di schiera si disponi cu la spada  
in manu risplindenti. - Avanti -, grida,  
e lu pinnacchii supra l'elmu oscilla.  
Di contra sta lu troicu squadruni  
c'arretra all'appariri di Camilla,  
ma lu cumpatta lu richiamu fermu  
di l'ottimu Tarconti e contrattacca.  
Ripiega la ciuciara e torna arreri  
e cu stu modu di fintari sveltu  
na stragi ti cumbina tra li Troj:  
attaccannu e scappannu e viceversa,  
trova lu modu di pirciari panzi,  
facci e pitturini, rumpennu scudi  
curazzi ed elmi, e già pirdenti pari  
l'armata etrusca nta lu campu apertu.

## *Morti di Camilla*

Ma Giovi Arrunti cerca e lu cunvinci  
di non scappari e cuntrullari fermu  
lu modu di pugnari di Camilla,  
ca ci assignò lu Fatu lu distinu  
di fari sicca la ciuciara fera.

Chiangi a stu puntu la divina Trivia  
ca vidi di Camilla l'imminenti  
fini e vulannu scinni nta lu campu,  
pi fari la minnitta già prumissa.

Intantu curri arreri di Cloreu  
Camilla ca scippari, dopu mortu,  
ci voli la gualdrappa russa e d'oru.

Cavalcari la vidi Arrunti scinta  
supra 'n-cavaddu ca pareva ventu,  
cu l'arcu tintinnanti nta li manu,  
ca di murtali strali era balestra.

Cu l'asta pronta ad azziccarla allura  
cu lu cavaddu la rincurri e dici:  
- Orsù Camilla forti nta stu chianu,  
ca preferisci all'amurusu lettu,  
apri la vucca e lingua tira fora  
ca di tia vogghiu sentiri l'afflatu  
prima ca l'asta mia assitata azziccu  
nta lu to corpu virginali e friscu. -  
Idda non parra e tracutanti e fera,  
alla tagghiata minna cu la manu  
la corda porta di l'arcata virga;  
ma prima di scuccari di luntanu  
dardu murtali, l'azziccanti ferru  
d'Arrunti agghica ed arrumazza in terra.

Murenti trova l'accurrenti Arrunti,  
la vergini Camilla ca ci dici:

- Moru cuntenta d'essiri azziccatu  
di lu to ferru smarruggiatu e feru,  
ma tu mi segui ca m'aggradi infini,  
pirchè mi guardi cu passioni vera  
e tu cummatti pi fundari Roma.  
Non sulu morti ma piaciri duni  
a mia ca vidu nta st'arcanu istanti  
la gloria di sta terra ch'era vanu  
difenniri da cu' la voli granni.

Mori Camilla e chiangi Arrunti ad idda  
ca vuluta l'avissi trapassari  
cu l'asta di l'amuri e non di morti.  
Ma lu chiantu ci resta nta la gola  
pirchè stramazza mortu supra d'idda  
cu 'n-azziccatu strali nta lu coddu.

### ***Fuga di la cavalleria latina***

La morti di Camilla nta lu campu  
scuraggia li Latini ca scantati  
ritornanu a Laurentu senza capu.

A Turnu la nuvena di dda morti  
agghica e pensa di turnari arreri  
pirchè li Troj sutta di li mura  
sunu arrivati di Laurentu, pronti  
a trasiri vincenti nta li strati.

Mentri ca Turnu si ritira, agghica  
Enea ca marcia senza opposizioni  
versu Laurentu cu li fanti toschi.

Si squadranu a distanza e di luntanu  
li due nimici ca custretti sunu

dall'incombenti notti ad astutari  
lu disideriu forti di pugnari.  
La notti duci cala, ca lu carru  
di Febu si ritira pi turnari  
dumani risplindenti, ma Laurentu  
chiangi e vulissi ca lu jornu dopu  
fussi chiù megghiu 'un arrivassi mai  
pirchì forieru di duluri e morti!